

Kumwona Asiyeonekana

Kwa imani akatoka Misri, asiogope ghadhabu ya mfalme, maana alistahimili, kama amwonaye yeye asiyeonekana. Waebrania 11:27.

Musa alikuwa na hisia ya kina ya uwepo binafsi wa Mungu. Hakuwa tu akitazama katika historia yote kwa ajili ya Kristo kudhihirishwa katika mwili, bali alimwona Kristo kwa namna ya pekee akiambatana pamoja na wana wa Israeli katika safari zao zote. Mungu alikuwa halisi kwake, daima alikuwepo katika mawazo yake. Alipokosa kueleweka, alipoitwa kukabili hatari na kubeba matusi kwa ajili ya Kristo, alistahimili bila kulipiza kisasi. Musa alimwamini Mungu kama yule ambaye alimhitaji na ambaye angemsaidia katika hitaji lake. Mungu kwake alikuwa ni msaada ulio karibu.

Imani nyingi tunazoziona ni za kawaida tu; imani ya kweli, yenye kutumainia na yenye kuvumilia ni nadra. Musa alitambua katika uzoefu wake mwenyewe ahadi kwamba Mungu atakuwa mtoaji wa thawabu kwa wale wanaomtafuta kwa bidii. Alikuwa na heshima kwa malipo ya thawabu hii. Hapa kuna jambo lingine kuhusu imani ambalo tunapaswa kujifunza; Mungu atampa thawabu mwanadamu mwenye imani na mtiifu. Ikiwa imani hii italetwa katika uzoefu wa maisha, itamwezesha kila mtu anayemcha na kumpenda Mungu kustahimili majaribio. Musa alikuwa amejaa imani kwa Mungu kwa sababu alikuwa na imani inayompokea Kristo kama wake binafsi. Alihitaji msaada naye aliuomba, akaupata kwa imani na akafuma katika uzoefu wake imani kwamba Mungu alimjali. Aliamini kwamba Mungu alitawala maisha yake hasa. Alimwona na kumkubali Mungu katika kila maelezo makamilifu ya maisha yake na akahisi kwamba alikuwa chini ya jicho la Yule anayeona yote, ambaye anaipima nia, ambaye anaupima moyo. Alimwangalia Mungu na kumtumainia kwa ajili ya nguvu ya kumpitisha bila kupotoshwa katika kila aina ya jaribu ... Uwepo wa Mungu ulitosha kumpitisha katika hali ngumu kabisa ambayo mwanadamu angeweza kuwekwa.

Musa hakufikiri tu juu ya Mungu; alimwona. Mungu alikuwa ni maono ya kila siku mbele yake; hakuwahi kuacha kuona uso Wake. Alimwona Yesu kama Mwokozi wake na aliamini kwamba sifa za Mwokozi zingeweza kuhesabiwa kwake. Imani hii kwa Musa haikuwa kazi ya kubahatisha; ilikuwa ni halisi. Hii ndiyo aina ya imani tunayoihitaji, imani ambayo itastahimili jaribio. Lo! Ni mara nyingi kiasi gani tunasalimu amri kwa jaribu kwa sababu hatukazi jicho letu juu kwa Yesu!